



Republika e Kosovës • Republika Kosovo • Republic of Kosovo
Institucioni i Avokatit të Popullit • Institucija Ombudsmana • Ombudsperson Institution

Prishtinë, më 30 prill 2025

Z. Ymer Fejzullahu, Kryesues i Bordit
Zyra e Rregullatorit për Energji
Rr. "Bekim Fehmiu" (ish-Ndërtesa e Fazitës) kati 2
10 000 Prishtinë

Për njoftim:

Z. Albin Kurti, Kryeministër në detyrë
Qeveria e Republikës së Kosovës
Sheshi "Nëna Terezë"
10 000 Prishtinë

R. nr. 538/2025

**KËRKESË PËR PEZULLIMIN E ZBATIMIT TË VENDIMIT V_2697_2025 DHE TË
VENDIMIT V_2698_2025, TË DATËS 11 PRILL 2025**

I nderuari z. Fejzullahu,

Avokati i Popullit, në bazë të nenit 16, paragrafi 4, të Ligjit nr. 05/L-019 për Avokatin e Popullit, ka hapur hetime sipas detyrës zyrtare (Ex Officio) lidhur me çështjen e ngritjes së çmimit të energjisë elektrike, përkatësisht miratimit të Vendimit V_2697_2025 dhe të Vendimit V_2698_2025, nga Zyra e Rregullatorit për Energji (ZRRë). Lidhur me këtë çështje Avokati i Popullit ka pranuar edhe disa ankesa të tjera, të cilat shfaqin shqetësimet e tyre rreth çështjes së rritjes së çmimit të energjisë elektrike dhe ndikimit të kësaj rritjeje në jetën e qytetarëve të Republikës së Kosovës.

Përkitazi me këtë çështje, Avokati i Popullit më 7 prill 2025 ka mbajtur takim me Bordin e ZRRë-së, i cili ka njoftuar për shkaqet sipas të cilave konsiderohet e nevojshme rritja e çmimit të energjisë elektrike, si dhe me procedurën e zhvilluar rreth kësaj çështjeje. Avokati i Popullit, edhe përkundër paraqitjes së argumenteve nga ZRRë-ja për nevojën e rritjes së çmimit të energjisë elektrike, nuk është bindur se është e domosdoshme një rritje e tillë e çmimit të energjisë elektrike, në rrethanat aktuale të boshllëkut institucional që gjendet Republika e Kosovës, gjë që e ka pamundësuar zhvillimin e komunikimeve ndër-institucionale me qëllim të gjendjes së një zgjidhjeje më të favorshme për qytetarët e Republikës së Kosovës.

Avokati i Popullit ka vërejtur se ZRrE-ja, më 11 prill 2025, ka nxjerrë Vendimin V_2697_2025, me të cilin i ka aprovuar të hyrat e lejuara maksimale që do të mblidhen nga Operatori i Sistemit të Shpërndarjes (OSSh) - KEDS Sh.A., për vitin relevant tarifar 2025; dhe Vendimin V_2698_2025, me të cilin i ka aprovuar të hyrat e lejuara maksimale për Furnizuesin e Shërbimit Universal.

Lidhur me këtë çështje Avokati i Popullit ka analizuar Vendimin V_2697_2025 dhe ka vërejtur se në Pikën 2 të dispozitivit është përcaktuar se të hyrat e lejuara maksimale që do të mblidhen nga OSSh-ja për vitin relevant tarifar 2025 janë në shumën e 180.652.995 €.

Ndërsa në Vendimin V_2698_2025, në Pikën 2 të dispozitivit është përcaktuar se të hyrat e lejuara maksimale të Furnizuesit me Shërbim Universal, për vitin 2025, do të jenë në shumën 435.926.299 €.

Avokati i Popullit thekson se zbatimi i vendimeve V_2697_2025 dhe V_2698_2025 ndikon drejtpërdrejt në rritjen e kostos së jetesës së qytetarëve të Republikës së Kosovës, e rrjedhimisht do ndikojë në uljen e standardit jetësor, si dhe do të ndikojë në rritjen e numrit të familjeve që do kenë nevojë për mbështetje shtetërore, ndërsa familjeve me asistencë sociale do t'ua bëjë edhe më të vështirë mënyrën e jetesës.

Avokati i Popullit, duke pasur parasysh se zbatimi i këtyre vendimeve ka efekt të drejtpërdrejtë në të drejtat e njeriut, konsideron se ZRrE-ja është dashur të kishte komunikime më të detajuara me institucionet relevante, të cilat kanë kompetenca të caktuara sipas Ligjit nr. 05/L-085 për Energjinë Elektrike, me qëllim të gjetjes së zgjidhjeve të qëndrueshme.

Për më tepër, duke pasur parasysh efektet e drejtpërdrejta në të drejtat e njeriut si dhe duke pasur parasysh obligimin e institucioneve shtetërore sipas Ligjit për Energjinë Elektrike, Avokati i Popullit konsideron se ZRrE-ja është dashur që bashkërisht me institucionet shtetërore të gjenin një zgjidhje ku institucionet do ta mbulonin koston e ngarkesës për energjinë elektrike, në mënyrë që ndryshimi i çmimit të energjisë elektrike të mos i godas drejtpërdrejt qytetarët e Republikës së Kosovës.

Avokati i Popullit vlerëson se ky diskutim dhe kjo zgjidhje do të mund të bëheshin reale nëse institucionet e Republikës së Kosovës do të ishin të konstituara në kohën kur ZRrE-ja ka ndërmarrë veprimet për nxjerrjen e vendimeve të theksuara më sipër. Për këtë shkak, Avokati i Popullit thekson se procedurat e zhvilluara nga ZRrE-ja do të duhej të prisnin pas konstituimit të institucioneve të Republikës së Kosovës.

Avokati i Popullit është i vetëdijshëm se ZRrE-ja është organ i pavarur dhe funksionon në mënyrë të pavarur, megjithatë konsideron se duhet të ekzistojë komunikim i mirëfilltë me institucionet relevante në fazat e tilla kur preket interesi i të gjithë qytetarëve të Republikës së Kosovës.

Lidhur me këtë çështje, Avokati i Popullit konsideron se Qeveria e Republikës së Kosovës, në bashkëpunim me ZRrE-në, do të duhej të ndërmernte hapa konkretë në drejtim të gjetjes së një zgjidhjeje më të përshtatshme për qytetarët e Republikës së Kosovës, lidhur me çështjen e rritjes së çmimit të energjisë elektrike.

Për më tepër, Avokati i Popullit, duke pasur parasysh faktin se rritja e çmimit të energjisë elektrike pritet të reflektojë në çmimin e të gjitha produkteve të tjera, vlerëson se një vendim i tillë mund të merrej pas shterimit të të gjitha komunikimeve mes ZRrE-së dhe institucioneve të Republikës së Kosovës.

Avokati i Popullit vlerëson se nxjerrja e akteve të tilla në situata siç është aktualisht Republika e Kosovës, e të cilat i obligojnë qytetarët e Republikës së Kosovës që energjinë elektrike ta paguajnë me çmim më të lartë, prodhon pasoja të pariparueshme për të gjithë qytetarët.

Rrjedhimisht, duke u bazuar në nenin 18, paragrafi 5, të Ligjit për Avokatin e Popullit, i cili përcakton:

“Nëse gjatë hetimeve, Avokati i Popullit konstaton se ekzekutimi i ndonjë vendimi administrativ mund të ketë pasoja të pariparueshme për personin fizik apo juridik, mund të rekomandojë që autoriteti kompetent ta pezullojë ekzekutimin e vendimit në fjalë deri në përfundimin e hetimeve lidhur me këtë çështje nga ana e Avokatit të Popullit.”, atëherë Avokati i Popullit i rekomandon ZRrE-së pezullimin e ekzekutimit të Vendimit V_2697_2025 dhe të Vendimit V_2698_2025, të datës 11 prill 2025, deri në përfundim të hetimeve nga Avokati i Popullit lidhur me pretendimet e ankuesve rreth çështjes së rritjes së çmimit të energjisë elektrike.

Avokati i Popullit konsideron se kriteri substancial i rekomandimit për një pezullim të tillë është përmbushur qartazi në këtë rast, për shkak se veprimet sipas Vendimit V_2697_2025 dhe Vendimit V_2698_2025, shkaktojnë dëme të pariparueshme të të drejtave të qytetarëve të Republikës së Kosovës.

Në pajtim me nenin 24, paragrafi 2, të Ligjit nr. 05/L-019 për Avokatin e Popullit, ju lutemi të na njoftoni për veprimet që do t'i ndërmerri, si përgjigje ndaj kërkesës për pezullim të vendimeve V_2697_2025 dhe V_2698_2025, të datës 11 prill 2025.

Në pajtim me nenin 132, paragrafi 3, të Kushtetutës së Republikës së Kosovës dhe me nenet 18 (paragrafët 4 dhe 6) dhe 25 të Ligjit nr. 05/L-019 për Avokatin e Popullit, ju lutemi që përgjigjen tuaj, përkitazi me këtë çështje, të na e dërgoni brenda një afati të arsyeshëm kohor, por jo më vonë se deri më 7 maj 2025.

Me nderime,

Naim Qelaj
Avokat i Popullit